

Maman!




Progjet promovût di 'Il Friuli' e 'ARLeF'

PIULON

CUI CHE AL
À SIMPRI
ALC DI CE
LAMENTÂSI

CJÂR DIARI,



Âstu mai viodude la nêf?
Jo, sì. E je blancje, frede
e fofe.

Âstu mai viodudis lis
monts? Jo, sì. A son
blancjis, altis e salvadiis.

Âstu mai viodût un gjat
infûr di me? Jo, sì. Al è grîs,
grues, **piulon** e al à non Vigji.

Vigji al è il gjat di Daria, la amie
de mê paronute, e lu ai cognossût a
Tarvis.

Lui al à pôre de nêf e al brame dome il
cjalt de stue.

Al discocole i voi di bot cuant che al
sint rumôrs che nol cognòs.

Par fâ cjapâ un spac a Vigji, mi soi
platade sot di une bancjute e... sbranf!

Lui al salte come une suste cuant che
al viôt robis che nol è usât... e cussì al
è sucedût!



O vin ancje zuiât a fâ sù un pipin di
nêf.

Vigji al è content di viodi che il pipin
di nêf i somee tant.

Jo o stoi ben cun Vigji: il gjat grîs,
grues, piulon
e tant bon.

Une bussade,
Lumi




LU SAVEVISO CHE...?



■ Tra i flocs di
nêf si formin piçui
spazis di aiar che
a fermin i rumôrs:
par cheste reson
daspò di une
neveade al è dut
un cidinôr!

> Tant par ridi

Pieri,
cuntun
cacan di
cjan in man



al dîs
al amì
Vigji:
"Di po,
Vigji! Cjale
ce che o
stavi par
pestâ!"

IL CJANTON DE CJANÇON



JOI, CE STOMI!

(Peraulis di Daria Miani;
musiche di Flaviano Miani)

*Joi, ce stomi, no tu sâs:
vê une pirule intal nâs!
Cualchi volte le ai cerçade,
no à savôr di marmelade.*

*Maronute e a forme strane,
jo tal zuri, no je sane!*

*Cjol subit un façolet
par che il nâs al sedi net.*

*Rit. Ce che o dîs al è tant just,
la cjançon e fâs disgust.*


Din dan din dan don.

E fâs stomi la cjançon.

Piçule cerce de cjançon "Joi, ce stomi!".
O podês scoltâle dute te pontade di Maman!
di cheste setemane su Telefriuli.

ZÛCS

Induvine di cui che a son lis olmis: unis
cuntune frece lis fotografis a man çampe
cun chês a man drete.



Soluzion: 1B, 2A, 3D, 4C

Maman! Tantis
sorpresis ogni
setemane.
Us din
apontament su



telefriuli

Vinars aes 5.45 sot sere

Pagjine curade di Daria Miani
e dal Sportel Regionâl
pe Lenghe Furlane de ARLeF

ARLeF
AGENZIE
REGIONÂL
PE LENGHE
FURLANE